

COLUMNA

Bello ha maglià mes carnet da quints

MARTIN CANTIENI

L'atun passà hai jau survegnì in e-mail da l'Uffizi da taglia da Laax (che gida sco ch'i para la vischnanca da Sagogn en dumondas da taglia). L' e-mail ha cumenzà cun «Sehr geehrter Herr Cantieni» e finì cun «Freundliche Grüsse». Era quai tranteren è stà scrit per tudestg.

Ma sehr-geehrter-dianter-diavel-dio-santohimmelsternen! Sche la vischnanca da Laax na scriva betg pli e-mails rumantschs, tgi lura?

Il Muothin en mai ha rebellà: Stai si! Ed jau hai respundì ch'jau giavischia da survegnir brevs rumantschas. Ma jau hai fatg il quint senza l'ustier, resp. senza signur E. da l'Uffizi da taglia. Quel è stà talmain irrità, permalà u sur-lavurà ch'el ha pensà – jau speculesch: ti mo spetga, sehr geehrter! Tge ch'el ha propi pensà na sai jau betg, perquai ch'jau n'hai udì nagut pli dad el, dapi lura. Suenter sehr geehrter èsi stà a fin.



Tge far? – Scrivere ina brev. Sin palpì. E-mails pon ir a perder, ma brevs arrivàn! E zuar a la suppranza da Laax. Cun la supplica da responder. Puspè in sbagl? Hai jau puspè permalà signur E.? Sfarlattà il temp stgars da la suppranza communalà? Probalmain. U sun jau victima da quels cas rarischens da brevs persas? Jau na sai betg. Ina risposta n'hai jau numadamain mai survegnì.

Tgi che smina ussa che jau saja in da quels che scriva brevs en il stil da vutbérgher sa trumpescha. Quai è stà tut cun ortografia e respect!

Amez mia comunicaziun unilateralà cun las instanzas communalas, arri-

va ina brev da l'Uffizi da construcziun bassa da l'onuraivel chantun triling: Ina infurmaziun areguard l'Odissea da la via da colliaziun tranter Sagogn e Laax. Cun dumondas e respostas detagliadas adressadas a tut ils abitants da Sagogn. Tut per tudestg! Himmel-sehr-geehrter-nochmal!

Tenor l'atgna constituiziun è Sagogn ina vischnanca rumantscha. Ma tge vul quai lura insumma dir, sche betg ch'i vegnia scrit per rumantsch?

Cun l'experiencia da mias brevs nunresponsivas hai jau scrit ina brev recumandada a Cuir. E perfin survegnì ina risposta! Ch'igl haja fatg prescha e che la vischnanca haja distribui il document (betg l'uffizi chantunal) e ch'il post da translaziun saja stà surchargià. Igl è sco da dumandar in scolaret daco ch'el n'haja betg fatg ils pensums. Bello ha maglià mes carnet da quints. Ma almain ina risposta.

Martin Cantieni da Sagogn/Turitg è student, schurnalist e bab.